

2. Salomoni episcopo Otrfidus.

	Si sálida gimúati	Sálomones gúati,	
	ther biscof ist nu édíles	Köstinzero sédale	S!
	Allo gúati gidúe, thio sín,	thio biscofa er thar hábetin,	
	ther inan zi thiu giládota,	in hóubit sinaz zuíualt	A!
5	Lékza ih therera búachi	iu sentu in Súabo rihi,	
	thaz ir irkiaset ubarál,	oba siu frúma uesaz sca	L.
	Oba ir hiar fíndet iauuht thés,	thaz uuírdig ist thes lésannes:	
	iz iuer húgu iruuálo,	uuísdumes fóll	O.
	Mir uuárun thio io uuizzi	iu ófto filu núzzi,	
10	fuerau uuísdum:	thes duan ih míhilan rua	M.
	O'fto irhugg ih múates	thes mánagfalten gúates,	
	thaz ír mih létut háрто	iues selbes uuórt	O.
	Ni thaz míno dohti	giuuérkon thaz io móhti	
	odo in thén thingon	thio húldi so gilángo	N:
15	Iz datun gómaheiti,	thio iues selbes gúati,	
	fuerau giráti,	nales míno dat	I.
	E'mmizen nu ubarál	ih druhtin férgon scal,	
	mit lón er iu iz fírgélte,	ioh sínes selbes uuórt	E
	Páradyses résti	gébe iu zi gilústi	
20	(ungilónot ni biléip	ther gotes uuizzode klei	P);
	In himilriches scóne	so uuérde iz iu zi lóne	
	mit géltes ginúhti,	thaz ír mir datut zúht	I.
	Sínt in thesemo búache,	thes gómo theheiner rúache,	
	uuórtes odo gúates,	thaz lích iu iues múate	S:
25	Chéret thaz in múate	bi thia zúhti iu zi gúate,	
	ioh zellet tház ana uuáne	al in íuuueran than	C.
	O'fto uuírdit, oba gúat	thes mannes íuungero giduat,	
	thaz es líuuit thráto	ther zúhtari gúat	O.
	Pétrus ther rícho	lono iu es blídlich,	
30	themo zi Rómu druhtin gráp	ioh hús inti hóf ga	P.
	O'banana fon himile	sént iu io zi gámane	
	sálida gimý'ato	selbo Kríst ther gúat	O!
	Oba ih irbálden es gidár,	ni scal ih firlázan iz ouh ál,	
	nub ih io bí iuih gerno	gináda sina férg	O,
35	Thaz hóh er iuo uuírdi	mit sínes selbes húldi,	
	ioh iu féstino in thaz múat	thaz sinaz mánagfalta gúa	T;
	Firlíhe iu sínes ríches,	thes hóhen himilriches,	
	bi thaz ther gúato hiar io uuíaf	ioh émmizen zi góte ria	F;
	Rihte iue pédi thara frúa	ioh míh gifúage tharazúa,	
40	tház uuir unsih fréuen thar	thaz gotes éuuiníga íá	R,
	In himile unsih blíden,	thaz uuízi uuir bimíden;	
	ioh dúe uns thaz gimúati	thúruh thio síno guat	!!
	Dúe uns thaz zi gúate	blídemo múate!	
	mit héilu er gibóran unard,	ther io thia sálida thar fan	D,
45	Vuanta es ni brístit furdir	(thes gilóube man mír),	
	nirfréuee síh mit múatu	iamer thar mit gúat	U.
	Sélbo Kríst ther guato	firlíche uns hiar gimúato,	
	uuir iamer fro sín múates	thes éuuinígen gúate	S!